

# 1 PETRO

## Petro Ovoli Ɔtonyade

<sup>I</sup> Ovoli kīi to yī, Petro, Yesu Kristo foto ɔnyane sekē. Ntselɛ ye mamena bati a kī Baguma pau, kī begba biko ndɛ banɔvɔē aye nɛ Ponto, Galatia, Kapadokia, Asia mɔ Bitinia amantam kame a.

<sup>II</sup> Baguma boe Ɔlega pau mi ndɛ ayekī ehihie eyi a, ade ye Hūhū a kpale mi akū kī míakɔa obu mikpa Yesu Kristo, lɔkɔa ekɔa ye babɔane evole mi akū.

Baguma emɔ mi kɔnya, efɔ lukudɔ lepɔ nɛ mi kame daa.

*Letsa a Kī Budzi Bɔadā Anɛ Kakpa Daa a.*

<sup>III</sup> Mifɔ bumu Baguma, boe Ɔlate Yesu Kristo Ɔlega a! Nɛ ye kɔnyakamɔ beblebee a sū ekpa boe nkpā vɔē etsāmena Yesu Kristo kadzela katomena kanɔkpa kame. Fukī fɔ budeī kɔnete a kī kɔkpɔla. <sup>IV</sup> Letsa a kī boe anɛ teī kī boe awɛ aata nyɛ adzapadie mɔ kɔya a kī Baguma manɛ eyi ekpa ye bati nɛ ode, awā kī yaávɔ, yaábu kade ade yaátse leme a. <sup>V</sup> Mi a kī mite Kristo mido, kī bekɔa Baguma kɔbē bemanɛ mi, kī Baguma aakpa mi nkpā nɛ luwi nkaɛ akū a, ade mi lá adzapadie kī a.

<sup>VI</sup> Mimɔ kawole nɛ fɔletsa kīi akū, tito kī nɛ lɔkɔ lukū kame malo, míamɔ lubo nɛ sohuiɛ ahɔlɔ ahɔlɔ pii kame, <sup>VII</sup> ayekī baadā nte mi katekado a sipi. Sika ngbā kī sapuli kawɔ malo, basɔ se kadā nɛ fi kame. Ade aye kenɛ kī besɔ mi

katekado a kī keɛ kɔya keba sika a bedā ayekī kɛna daa, lɔkɔa baamu mi, bekpa mi kukūkpale mɔ obu nɛ Luwi a kī Yesu Kristo aaya a akū. **VIII** Titɔ kī mitámɔ ye malo a, miawɛ ye kale, ade kī miámɔ ye finyaa malo a, mite ye mido, ade miamɔ kawɔɛ wī kadi kī oti leláapuli ɛɛ. **IX** Ayekī mite Kristo mido a sū, Baguma kpa mi tekla nkpā.

**X** Ade nkpā kī akū Baguma onukpɛ banyɛɛ a dzi bekɔna, bɛwɛ fɔletsɔ kame yededeede, ade beɛ biyi ayekī Baguma aamɔ mi kɔnya, ɛkpa mi nkpā a. **XI** Bɛbɔa mbɔdi bɛwɛ lɔkɔ a kī fɔaya mɔ ayekī fɔaya nɛ foe kame a. Ade fukī nɛ lɔkɔ a kī Kristo Hūhū nɛ be kame a katsa ayekī Kristo aamɔ lubo, mɔ kukūkpale a kī kóatomɔ koe a. **XII** Baguma nɛ etsa onukpɛ banyɛɛ a kī nné be kale sū bekɛna adzuma, mbom nɛ mi kale sū. Beɛ kɔdzɛla nɛ fɔletsɔ a kī finyaa fɔtɔ banyanɛ a tsā Hūhū Kpalɛwa kɔbɛ a kī Baguma do etomena ode a akū, bide letsā nɛ Kale Wī a akū. Ade fukī nɛ fɔtsa a kī Baguma ode fɔtɔ banyanɛ malo wɛ kī banu kayɔ kufɛ a.

### *Baguma Vɛ Boe Kī Bɔyadzi Nkpā Wī.*

**XIII** Nɛ foesū mina nɛ kukūmanɛ kame mikpa adzuma kakɛna, mipi mi akū kapi wī. Mikɔa anɛ flee mite nɛ nhila a kī Baguma aakpa mi nɛ luwi a kī Kristo aaya a akū. **XIV** Nde babi kī babu Baguma ni, mitafɔ sukɛna fɔwɛtsa kpa a kī fɔna nɛ mi kame nɛ kadikatanyi kame kɔkɔɛ a lenya mi akū. **XV** Nde ayekī Baguma a kī ɛvɛ mi a nɛ oti kpalɛwa a, ade aye kɛnɛ kī mi malo mianya bati kpalɛwa nɛ mi fɔtsakɛlawɔ fudi nɛ

fudi kame a. <sup>XVI</sup> Kitonekĩ Baguma le ne Katsela Kpalewa a le kĩ, “Minya bati kpalewa, kitonekĩ oti kpalewa mane.”

<sup>XVII</sup> Nte miave Baguma a kĩ yaádã oti ane ade yadzemo odi nye odi ne ye lekɛnana onukpẽ a kĩ boe ɔlega ne mi mpaɛ kame ni, kene kĩ miavila ye ne mi fuwi nkaɛ kame ne tite kĩĩ akũ. <sup>XVIII</sup> Kitonekĩ minyina kĩ nné sika ngbã ãye sika ovoe a kĩ savõ Baguma kɔa ese koto ne mi lolɔ, enye mi ne nkpã pupulidza kadzi a kĩ mi bawanyɔ kɔa biyi mi a kame, <sup>XIX</sup> mbom Kristo baboane mo kɔya paa a ekɔa ete mi. Kristo la nde kavelibi kĩ kekpoła ade mfumsu leme lelãa ke akũ a. <sup>XX</sup> Baguma pau ye eyi fomɔ ebɔa katinya, ade enye ye etsa ne fuwi nkaɛ kĩĩ kame ne mi sũ. <sup>XXI</sup> Mitsã Kristo akũ mite Baguma a kĩ edzela ye etomena kanokpa, edo ye obu leme a mido. Ne foesũ mi katekado mo kɔnete deĩ ne Baguma kame.

<sup>XXII</sup> Finyaa kĩ mite onokɔali kale a, mitsã ke kame mikpale mi akũ, ade miawe mi bawae Kristofɔ kale ne onokɔali kame a, kene kĩ miakɔa mi towɔle flee miwe akũ kale papaapa. <sup>XXIII</sup> Baguma kale a kĩ kideĩ nkpã, kĩ kelã kawũna a akũ fotsã mo Baguma kpa mi nkpã vɔẽ, mikena nde oti a kĩ yaaku a babi. Leme nné ekĩ yaku a babi miane. <sup>XXIV</sup> Nde ayekĩ Katsela Kpalewa a le kĩ,

“Batidziwa flee la nde tuwĩ aye  
ade be kahɛɛ flee la nde nhuile a.

Tuwĩ ave ade te nhuile a awili.

<sup>XXV</sup> Leme boe ɔlate kale a kã waa daa.”

Ade kale kīi nye Kale Wī a kī ke akū bide letsā bekpā mi a.

## II

### *Kristo Nyé Kola Okonto De a.*

<sup>I</sup> Ne foesū mifō tokpa tidi nye tidi odu kakena. Mifō fovā kama mō ane kame keke fotsa kakena, mō anengbā mō bati buī kanye. <sup>II</sup> Miwe Baguma onokoli kale a nde ayekī akokoa awe teme mui luwi daa, ayekī míabo ane ne mi nkpā kate kame. <sup>III</sup> Katsēle Kpalewa a le kī, “Mi mōawe mita onukpē midā, mimō ayekī boe Olate a deī seme kale.”

<sup>IV</sup> Ne foesū mifuā miya ne boe Olate a sekē. Ade ye nye nkpā kola kake de a kī bati sī kī lenye fotsa pupulidza, leme ade de Baguma nye kī lete koya ne ye ane a. <sup>V</sup> Mi malo mila nde kola kake nkpā boe, foesū miya Baguma ekōa mi eke hūhū kame afolie kola. Ade kola kīi kame míasum nde basofō kpalewa kī bebōa hūhū kame afolie kī yawo Baguma ane betsāmena Yesu Kristo akū bekpā Baguma. <sup>VI</sup> Kitonekī Katsēle Kpalewa a le kī,

“Midā! Īnye kola akū de titiliwu a,  
nkoa de mayi ne Zion.  
Odi nye odi kī ete ye edo ni,  
kōnyōā lelāawo ye da.”

<sup>VII</sup> Foesū mi a kī mite mido a ni, de kīi te koya paa lekpa mi, leme bikī betáte bido a kō ni, binyi kī,  
“De a kī kola bakene sī a,  
ade de leyadani okonto akū de  
kī lisī leba flee a.”

VIII Katsela Kpalewa a foletsa bebã leme le kã,  
 “Ade de a kã laafõ bati litula a,  
 de kpale kã laafõ bati lenε beto.”

Bitula beto kitonekĩ betáte ye kale a bido.  
 Baguma awe lihihiε foe lomo eyi ekpa be.

IX Leme mi kõ kade a kã Baguma pau,  
 legãkanya basofõ, omaĩ kpalewa, mo bati kã  
 Baguma kɔa ekena ye bade miane. Baguma ve mi  
 etomena otũ kame eyamena ne ye awãwã ohaĩ a  
 kame, kã mide letsã ne ye awãwã fotsa a akũ.

X Ne loko lidi kã letẽ kame ni, mitánya Baguma  
 omaĩ, leme finyaa minye ye omaĩ. Ne koko loko  
 lidi kame ni, Baguma támõ mi konya, leme finyaa  
 emõ mi konya.

### *Midzi Nkpã Nde Baguma Basate Aye.*

XI Nwaẽ ame bawene, nde banõvõẽ mo ba-  
 sitsãne ne katinya kãĩ kame ni, mitakena ne  
 sukena fowetsa kpa a kã foako odo kayidza kadza  
 ne mi akũ a. XII Mibõa obla wĩ ne amamufõ a  
 kame, ayekĩ nte bele kodzela ne mi akũ kã tokpa  
 bakenane miane malo ni, ke liti, baamõ adzuma  
 wĩ a kã mikena, lokõa baamu Baguma ne ye kaya  
 Luwi a akũ.

XIII Ne boe Olate sũ ni, midõla mi akũ mikpa  
 batidziwa a kã bidzina ne mbla onukpẽ. Midõla  
 mi akũ mikpa Legãnokõẽ Flefle a kã lideĩ otumi  
 lebẽ flee a. XIV Midõla akũ lomo leme mikpa abãã  
 banõkõẽ a kã Legãnokõẽ a ado kã beyaavele tokpa  
 bakenane a soto, bimu bati a kã bakena tuwĩ a  
 leme. XV Kitonekĩ Baguma kawε nye kã mikõa  
 tuwĩ kakena midina fokõasiatsa a kã bati ale ne  
 mi akũ ne kadikatanyi kame a. XVI Midzi nkpã  
 nde bati kã bidzi be akũ akũ aye, leme mitakõa

akũ akũ kadzi a mikena nde tɔkpa kakena osi kana, mbom midzi nkpã nde Baguma basate aye. **XVII** Mikɔa obu mikpa odi nye odi. Miwe mi bawaẽ bate badone kale. Mivila Baguma. Mikɔa obu mikpa Legãnokõ Flefle a leme.

*Kristo Lubokamɔ a Nye Nfantuhũ Fɔkpa Mi.*

**XVIII** Mi basumune, midɔla mi akũ mikpa mi balate, mikɔa obu flee mikpa be. Nné mi balate a kĩ bɛdɔ, bideĩ sɛmɛ kale a odi kene kĩ miakpa obu, mbom mibu bikĩ bideĩ sɛmɛ ɔnye a leme. **XIX** Nte odi lamɔ lubo a kĩ letáfeta kĩ emɔ kamɔ, lɛmɛ ne Baguma sũ edo ɔwɔle emɔ lubo ni, Baguma aahila ye. **XX** Nte mikena fɔtsa kpa mɔ mido ɔwɔle mite sɔtɔ kavele a ni, kamu kawɔdabe deĩ ne foe kame? Lɛmɛ nte mikena tuwĩ mɔ mido ɔwɔle mimó lubo ne foe kame ni, Baguma aahila mi. **XXI** Ade fukĩ sũ Baguma ve mi a, kitonekĩ Kristo mɔawe a malo mó lubo ne mi lolɔ, ekɔa foe etsa mi nfantuhũ kĩ míatsã ye abɔa kakekõ.

**XXII** “Etákɛna tɔkpa tidima,  
ade etáke odima lɛmɛ a.”

**XXIII** Kĩ bivũna ye a, etávũna odima ese kɔtɔ. Kĩ bɛmɔna ye lubo a, etáhũnahũna odima, mbom ekɔa ane ete ne Baguma a kĩ yadze fɔletsa ne osi kpĩ akũ a akũ.

**XXIV** Kristo mɔawe lelɔ boe tɔkpa ne ye sukɛna kame enamɛna asendua a akũ, ayekĩ bóanɛ ne tɔkpa kɔbẽ kayɔ, budzi nkpã bɔkɛna tuwĩ. Ekɔa fɔkpa a kĩ ete a etsa mi fɔsɔ. **XXV** Kɔkɔɛ a, mina nde baveli kĩ beyela osi, lɛmɛ finyaa Baguma muniki mi miya ne mi Baveli Ɔkpãne kĩ enye mi Akũ Ɔdãmenane sekẽ.

### III

#### *Batsõ Mɔ Banyɔ Akū Kɔde.*

<sup>I</sup> Ade ayea mi batsõ midɔla mi akū mikpa mi banyɔ, ayekī nte be kame badi táte Baguma kale a bido malo ni, mi ɔbla wī aafõ bete bido. Ade foláasī malo kī miabinya onukpẽ mile kadima, <sup>II</sup> kitonekī baamɔ ayekī mi ɔbla kabɔa ne Baguma kavila kame kpale mi akū. <sup>III</sup> Mi kalekadã ketana ne sukena kalɔla nde tolo kasui, sika ngbã fɔtsa kado, mɔ tilima kī tete kɔya kadzi kame. <sup>IV</sup> Mbom mi kalekadã a kena ne hūhū kī edo, yadã dīī kame, ade enya letsa a kī leláawɔ leme a. Tiyitsõ kīī odu te kɔya paa ne Baguma ane. <sup>V</sup> Ne kɔkɔe a, batsole kpalewa a kī bekɔa ane bite ne Baguma akū a, dɔla be akū bekpa be banyɔ, ade fɔnya akū kakeele fɔkpa be a. <sup>VI</sup> Ade aye Sara dɔla ye akū ekpa Abraham a, ade eve ye kī, “Yī ɔlate” a. Finyaa mi malo midani Sara babisole, nte miakena tuwī mɔ miávila letsama.

<sup>VII</sup> Ade aye mi banyɔ leme midzi mɔ mi batsõ ne akū kayɔkanu kame, kitonekī mi batsõ lelá kɔbẽ nde mi aye. Mikpa be obu kitonekī mimɔ be flee Baguma mó kɔnya kī míadzi nkpã kī elá kawūna. Nte miakena foe lomɔ ni, letsama leláasua mi mpaebɔ osi.

#### *Lubokamɔ Ne Tuwī Kakena Sū.*

<sup>VIII</sup> Ne kawūna kame a ni, mi flee mina ne adzuni mɔa kame, oti akū ekɔ mi kɔnya, miwe akū kale, mikena seme kale midɔla akū leme mikpa mi akū akū. <sup>IX</sup> Mitakɔa tɔkpa mise tɔkpa kɔtɔ, ñye midumu mise kadumu kɔtɔ, mbom

mivia nhila mikpa be, kitonekĩ kavε Baguma ve mi kĩ miyaana nhila.

**X** Nde ayekĩ Katselε Kpalεwa le a,  
 “Odi nye odi kĩ yawε kĩ edzi nkpā wĩ  
 εmɔ fuwi wĩ ni,  
 tuwuli kpa tetane tito ye onukpē  
 ade etáma fɔvã lemε a.

**XI** Kεne kĩ efɔ tokpa kakena, ekena tuwĩ,  
 εboα mbɔdi εwe lukudɔ osi,  
 etomɔ de liti mɔ ye ɔwɔle flee.

**XII** Kitonekĩ boe ɔlate anε teĩ ne tuwĩ bakenanε a  
 akũ,  
 ade ebinya ato yatse be mpaεbo a.

Lemε boe ɔlate a aboα kanε liti kakpa tokpa  
 bakenanε.”

**XIII** Nte akũ asĩ mi kĩ miakena tuwĩ ni, owei deĩ  
 kĩ yaakena mi fɔlɔewotsa? **XIV** Lemε nte míamɔ  
 lubo malo ne tuwĩ a kĩ miakena sũ ni, Baguma  
 ahila mi! Mitavila odima, letsama lemε letaha mi  
 tɔwɔle. **XV** Mbom mikɔα obu mikpa Kristo, boe  
 ɔlate a ne mi tɔwɔle kame. Mimanε akũ lɔkɔ nye  
 lɔkɔ, kĩ míapuli minyε foe kayɔ mitsa odi nye odi  
 kĩ yaavia mi fɔletsα ne konεte a kĩ mideĩ a akũ.

**XVI** Lemε mikena foe ne obu mɔ akũ kadɔla kame.  
 Mifɔ mi tɔwɔle kame tekpalε, ayekĩ nte bivũna  
 mi malo ni, kɔnyɔã kuwo bikĩ bale tuwuli kpa  
 ne ɔbla wĩ a kĩ miabɔα nde Kristo batomenanε a  
 sũ.

**XVII** Kitonekĩ nte fɔnye Baguma kawε ni, fɔnεnε  
 kĩ míamɔ lubo nde tuwĩ bakenanε, keba kĩ  
 míamɔ lubo nde tokpa bakenanε. **XVIII** Kristo  
 lemε ku ne bati tokpa lɔlɔ deedimɔape ekpa fɔkɔ  
 a flee. Tito kĩ enyε oti wĩ malo a, eku ne tokpa  
 bakenanε lɔlɔ ayekĩ yaakpã mi enamεna Baguma



sekẽ. Beko ye ne sukena kame, leme Baguma dzela ye edzi nkpã ne Hũhũ kame. XIX Ena ne Hũhũ a kame, ade enale Baguma foletsa ekpa hũhũ a kã ewaa kola a. XX Ade be nye bati a kã betátse Baguma oledo, tito kã Baguma na owole boe ekpa be malo a ne loko a kã Noa kame ye adakã kpale a. Ye kame bati sukuloo kã biwo be elẽ lena nkpã ne mui kayili a kame. XXI Mui kayili kã ketimo mui kawola amanie a kã finyaa bekoa bete mi nkpã. Nné tuduli kavole ne oti akũ foane, mbom fonye fubo kalo kã oti aakoa ye owole flee ekpa Baguma. Baguma mui kawola a lete mi nkpã fotsãmena Yesu Kristo kayidza kato kanokpa a akũ. XXII Kristo naa ode, ade edzi ne Baguma somona, yanya Baguma ode foto banyane, mo ode otumifo mo kobẽ flee akũ a.

## IV

### *Kene Kĩ Bate Badone Nkpã Kadzi Kevmena.*

<sup>I</sup> Ayekĩ Kristo mó lubo nde otidziwa aye a ni, mi malo miakoa adzuni moape a mido mi akũ kobẽ, kitonekĩ odi nye odi kã emo lubo ne sukena kame ni, yafõ tokpa kakena. <sup>II</sup> Foesũ kito finyaa kanaa ni, midzi mi nkpã fuwi nkae ne tite akũ a ne Baguma kawe onukpẽ, nné ne otidziwa fowetsa kã foako odo a onukpẽ. <sup>III</sup> Koko a, mibula loko kade, midzi nkpã mikakena fotsa nde amamufõ aye ne loko pii kame. Nkpã a kã midzi tã a nye kokobato kpa kaboa, sukena fowetsa kpa liti katomena, bave kawuga, anya kpa kanya, futo kpa kato, mo baviõ kasum kã foláa mbla adima kayo. <sup>IV</sup> Finyaa foakena amamufõ a wãwã kã

mibuki miádo akū ne be nkpā pupulidza kadzi kame, ne foesū bale mi akū tuwuli kpa. <sup>V</sup> Leme baanye be akū onukpē bekpa Baguma a kī emane akū kī yaadzemo bati a kī bidzi nkpā mo banokpa flee a. <sup>VI</sup> Ade foesū Kristo de letsā ne Kale Wī a akū ekpa banokpa a leme a. Ade tito kī Baguma adzemo be nde kefeta odi nye odi malo ni, Kristo de letsā ekpa be ayekī ne hūhū kame ni, baadzi nkpā nde Baguma aye.

*Kene Kī Bokena Baguma Futetsa Akū Adzuma, Boko Busum Akū Akū.*

<sup>VII</sup> Fotsa flee kawūna loko fuā, foesū mipi mi akū kapi wī, mina ne kukūmane kame, ayekī miapuli miboa mpaε. <sup>VIII</sup> Letsa titiliwu nye kī, miwe akū kale mo odo kī eto mi towole kame flee, kitonekī odo afō bati akoa bati bebā tokpa pii kate. <sup>IX</sup> Nte mi kame odi nase owaē ni, ete ye mo kawole hūhūhūhū kakena fotana ne foe kame. <sup>X</sup> Mi kame odi nye odi te futetsa potii etomena Baguma sekē. Foesū nde Baguma futetsa futefute kī akū badāmenane ni, mikena foe akū adzuma kakena wī, ayekī fōana libi fokpa mi akū akū. <sup>XI</sup> Nte odi ale Baguma foletsa ni, ele foe nde Baguma foletsa aye. Nte odi asum ni, ekoa kobē a kī Baguma kpa ye a esum, ayekī ne letsa nye letsa kame ni, bati aatsā Yesu Kristo akū bimu Baguma. Ye fude nye kukūkpale mo kobē daa daa. Foya lomo.

*Lubokamo Nde Okristoni Aye.*

<sup>XII</sup> Yī bawene, mitafō ayekī belamo mi kaso kadā, milamo lubo kamo mo kaloe lekena mi wāwā nde letsa vōē kī miádā ane kolaa.

XIII Mbom mifõ kawõle kide mi kĩ miamo lubo nde Kristo aye, ayekĩ nte ενέ eta ne ye kukũkpale a kame ni, mi malo míafuli mimó kawõle mitu osee. XIV Nte bati vũna mi kĩ mi ne ayekĩ mitomõ Kristo sũ ni, kawõle kide mi, kitonekĩ kukũkpale Hũhũ a, kĩ enye Baguma Hũhũ a tomõ mi. XV Nte mi kame odi amõ lubo ni, fotanya kĩ enye owudini, ãye oyekpane, ãye fotsa kpa okenane ãye kĩ edo onukpẽ ne bati bebã foletsã kĩ fotséla ye akũ a kame. XVI Leme nte mi kame odi amõ lubo kĩ enye Kristo ode sũ ni, konyõã kotakõ ye, mbom emu Baguma kĩ Kristo dĩ teĩ ne ye akũ. XVII Lokõ wo otõ kĩ Baguma aayi bati kadzemenã kayõ, ade ye moawe toto kame yaanya lotõ edzemenã a. Ade nte eyi kayõ ne boe akũ a, nde fõawũna fõkpa bati a kĩ betáte ye Kale Wĩ a bido a? XVIII Nde ayekĩ Katselé Kpalewa a le a,

“Nte fudeĩ osĩ fõmõ Baguma aate bati kpĩĩ bena nkpã ni,  
kekõ nde fõana fõkpa bati a kĩ baávila  
Baguma mõ tokpa bakenane a?”

XIX Foesũ bati a kĩ bamõ lubo nde ayekĩ Baguma we ekpa be a bekena tuwĩ, bekõa be okla flee bido ne be Oboane a kĩ yaápãã ne ye kalekayi akũ da a awe kame.

## V

### *Midã Baguma Baveli Kõdabu a Kadã Wĩ.*

<sup>1</sup> Finyaa, yĩ nde asõli onokõẽ aye ni, mawe kĩ made asafu banokõẽ a kĩ bideĩ ne mi kame a. Yĩ moawe a mmó ayekĩ Kristo mó lubo, ade maana tsefã ne ye kukũkpale a kĩ baanye betsa

a kame a. Makpa mi kɔde kī, <sup>II</sup> Mikpā Baguma baveli kɔdabu a kī ekɔa edo ne mi awe a kadā wī. Midā be akū nde ayekī Baguma awe ne ɔɔ kame, kī nné ne ɔhe kame. Mitakena adzuma ne kɔɔkase sū, mbom mifɔ futo mi ɔwɔle faa kame. <sup>III</sup> Mitawe kī mianya bati a kī Baguma kɔa edo mi ne awe a akū, mbom mi ɔbla enya nfantuhū ekpa baveli kɔdabu a. <sup>IV</sup> Nte Baveli ɔdāmenane ɔnɔkɔē a ne eta ni, míana kukūkpale legābɔe a kī de ɔhaī a lelāabu kade.

<sup>V</sup> Ade ayea mi bapopo leme midɔla mi akū mikpa mi banɔkɔē a. Mī a flee midɔla akū mikpa mi akū, misum akū ne mi lekenana lidi nye lidi kame. Kitonekī Katsɛle Kpalɛwa a le kī, “Baguma ayidza kadza ne bati a

kī badɛla be akū ne ode a akū,  
leme yamɔ bikī bedɔla be akū a kɔnya.”

<sup>VI</sup> Ne foesū midɔla akū mido ne Baguma kɔbē awe a kayɔ, ayekī yaadɛla mi ne ode ne ye mɔawe lɔkɔ wī a kame. <sup>VII</sup> Mikɔa fɔtsa a kī fɔaha mi a flee mido ne Baguma awe kame, kitonekī ye adāmena mi akū.

<sup>VIII</sup> Mina ne kukūmanɛ kame, mikaadā kadā wī! Mī okesīne, Abonsam, tsē yamini nde Dzata kī yakulumɛ, kī yawɛ odi epi eyɛle eba. <sup>IX</sup> Mikɔa kadza pintii ne katekado kame misua tɔkpa osi, kitonekī minyina kī mi bakɔba Kristofɔ ne katinya kame flee lamena lubo kī odu kamɔ.

<sup>X</sup> Leme ne mi lubo kamɔ lɔkɔ lukū liti ni, Baguma a kī ye kɔnyakamɔ pɔne a, aakena mi mikpɔla, edo mi kɔbē midza pintii. Kitonekī eve mi kī miyaana tsefā ne ye daa kukūkpale a kame, ne ɔmɔa kakena mɔ Kristo sū. <sup>XI</sup> Ade ye deī kɔbē daa daa a! Fɔya lomɔ.

*Kawõna Nkaε.*

<sup>XII</sup> Ntsele fõletsa lukũ kũ ntsãmena Silvano akũ mama mi. Mabu ye nde okõba okristoni kũ yadi onokõali. Mawε kũ mado mi kõbẽ mõ letsa a kũ yĩ mõawε mmó kũ ade Baguma kõnyakamõ a ne awĩ a. Midza pintii ne ye kame.

<sup>XIII</sup> Babilonia asafu a, kũ Baguma pau nde mi aye a, awõna mi. Ade aye yĩ obi Marko lemε awõna mi a. <sup>XIV</sup> Miwõna akũ ne Kristo odo kame.

Lukudo litomõ mi flee a kũ mikena omõa mõ Kristo.

**Baguma Apam Vɔɛ a Tuwuli**  
**Tuwuli: Baguma Apam Vɔɛ a Tuwuli New Testament**  
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 21 Feb 2024 from source  
files dated 29 Jan 2022

68df0193-2981-5275-8994-8f743fe01e5e